

# Xujun xi tjun kits'inntu nda postru Jua

## B'i ts'in tsakuya Jua yaha Een

**1** T'ib'enijmíhi xi tu b'a ts'in jahá tijná santa nkúhu nga tuts'ihín ni. Kinu'yái ntaha ko tukuin kiyakohóni. Kiyai ko ntsai kin'ekohóni. Kui xi Én xi ts'ink'íentu tík'un xuta. <sup>2</sup>Y'ejná tík'un ajinni ko jin kiyai. Tíbxinya kixi ni xi kiyai ko t'ib'enijmí xi tijná tík'un sín, xi y'ejñajihín Ntia Na'miu ko xi jin kis'ejná chjini.

<sup>3</sup>Xi kiyai ko kinu'yái, kui xi ta t'ib'enijmíhi ko jun, tu xi b'a ts'in ko jun nkuhú kamakohóni. B'a ts'in nkuhú kamangujinkaá Ntia Na'miu ko Jesucristo xi Ntíhi maha. <sup>4</sup>T'ib'et'aihi ni xu'bi tu xi k'úé tsjo tsjohonuu.

## B'i ts'in tsakuya Jua nga ni xi n'eé bakúchji tsa kis'ejinná Ntiana

<sup>5</sup>Tsakúyani Jesucristo nga Ntiana, kui xi nd'í xi ts'in ndzjen ko ndahachí najmi tjin má jyun ajihín. Kui xi t'ib'enijmíhi. <sup>6</sup>Tsa b'a kuixíaán nga Ntiana ts'ená ko tu sa má jyuuhún tintsuba ngáá, tích'anacháá ko najmi tín'eé ni xi naxu tjin. <sup>7</sup>Tunga tsa tintsubaá má ndzjeen xi nkú ts'in tijná Ntiana má ndzjeen, b'a ts'in nkuhú makáá xinkíá ko jníhi Jesucristo xi Ntíhi Ntiana ts'in jená nga kjexinná ngayjee ngatitsunná.

<sup>8</sup>Tsa najmi tjiná ngatitsun kuixíaán, ta náha tích'anacháá yjoná ko najmi tijnajinná ni xi naxu tjin. <sup>9</sup>Tsa n'ekié yjoná nga tjiná ngatitsun, ts'ínndyjat'aná ngatitsunná Ntiana ko ts'ín jená nga kjexinná ngayjee ni xi tjintujinná xi najmi naxu nginkun. B'a ts'ín at'aha ja kitsjá éhen nga b'a ts'ín ko ts'in ni xi naxu tjin. <sup>10</sup>Tsa najmi tjiná ngatitsun kuixíaán, tíya tsank'áá Ntiana ko najmi tijnajin animaná éhen.

**2** Jun ntíng, t'ib'et'ánuu ni xu'bi tu xi najmi n'ehenu ngatitsun. Tunga tsa tjin xi ts'ín tjen'yún ngatitsun, tijnáná xi kuinchjantjainá nginkun Ntia Na'miu, kui xi Jesucristo xi naxu ts'in. <sup>2</sup>Kui xi kitsjá yjoho xi nkúhu chje tu xi n'endyjat'ahaná ngatitsunná ná xi ja kis'ejinná. Ko najmi tu suba ngatitsunná kits'innnyjat'a, ko ní ngatitsuhun ngayjee xuta xi tjin asuntee.

<sup>3</sup>Tsa t'in'etjusaán ni xi y'ejña Ntíaná, b'a ts'in yahaná nga ja yaá Ntíaná. <sup>4</sup>Tsa tjin xi: "An be" kuitsu, tunga tu sa najmi ts'intjusuhún ngá ni xi y'ejña, kui xi nda tsank'á. Najmi tijnajin animaha ni xi naxu tjin. <sup>5</sup>Tunga xi ts'intjusun éhen, kjuaxi nga kui xi ts'intjo Ntíaná xi nkú nga ts'in tjihin nga ts'íintjo. Nk'ie nga b'a n'e bintsubaá, b'a n'e yahaná nga tintsujihín. <sup>6</sup>Xi tijnajin ni xi ts'e Ntíaná kuitsu, kui xi xi nkú ts'in y'ejña Jesucristo, b'a ts'in tjihin nga k'úejña.

### **B'i ts'in tibatéxumaha Jua xuta ninku**

<sup>7</sup>Já nts'ena, ni xi t'bet'ánuu nd'ai, najmi as'ai t'béjñahá Ntíaná. Kjuatéxuma chá xi kin'ekjas'en nínuu santaha nga tuts'ihin ni t'bet'ánuu. Kui kjuatéxuma chá xu'bi, kui éhen xi ja kinu'yó nk'ie.

<sup>8</sup>Tunga xi nkú ts'in y'ejña Jesucristo ko xi nkú ts'in tintsuboo b'ejña chji nku ni tsetse xi y'aha ra ni xi y'ejña Ntíaná. Kui ni xi t'bet'ánuu ei at'aha ja j'ai ts'in ndzjen nd'í xi ndoo. Kui nga ja tífi ndyjaha má jyuun.

<sup>9</sup>Xi b'a kuitsu nga má ndzjeen síjña tunga tu sa unkiehé ngá nda nts'e, kui xi má jyuun síjñajin sa. <sup>10</sup>Xi tjoho nda nts'e, kui xi má ndzjeen síjña tehente, má nga najmi tjin ni xi ts'ínkijnejihin ngatitsun. <sup>11</sup>Tunga xi unkie nda nts'e, kui xi má jyuun síjña ko yo tsú'ba ko najmi be má xi tjeheh tífi, at'aha ja kits'ínkahá má jyuun.

<sup>12</sup>Jun ntína, títs'inntúnuu at'aha tu ngat'aha ni xi kits'in Jesucristo kin'endyjat'ahanuu ngatitsunuu. <sup>13</sup>Ko jun xi tí'minuu na'mi, títs'inntúnuu at'aha ja yo xi tu b'a ts'in jahá tijná santaha nga tuts'ihin ni. Ko jun xi tí'minuu já asti, títs'inntúnuu at'aha kin'e nganohoo ndanindoo.

<sup>14</sup>Jun ntína, ja kuats'inntúnuu at'aha ja yo Ntía Na'miu. Ko jun xi tí'minuu na'mi, ja kuats'inntúnuu at'aha ja yo xi tu b'a ts'in jahá tijná santaha nga tuts'ihin ni. Ko jun xi tí'minuu já asti, ja kuats'inntúnuu at'aha tjinuu nga'yún ko tijnajin tehente animanuu éhen Ntíaná ko at'aha ja kin'e nganohoo ndanindoo.

<sup>15</sup>Najmi tu n'etjó asuntee ko ta ndaha ni xi tsjá asuntee. Tsa tjin xi tjoho asuntee, kui xi najmi tjoho Ntía Na'miu. <sup>16</sup>At'aha ngayjee ni xi tsjá asuntee najmi má tijná Ntía Na'miu nibáha ra. Asuntee ní nibáha ra. Yo nibáha ra nga nchjaha animaha xuta ni xi tjin ko nga mjehe ts'íints'e ni xi fásihin ko nga nk'a b'asje yjoho ngat'aha ni xi tjihin. <sup>17</sup>Ja tífe nistjihin asuntee ko ni xi nchjaha animaha xuta, tunga máha xi títs'in xi nkú ts'in mjehe Ntíaná, kui xi k'úejña sín.

### **B'i ts'in tsakúya Jua nga chúhuún yjoná já xi fi kontraha Jesucristo**

<sup>18</sup>Jun ntína, ja nistjin xi fekuu tintsubaá nd'ai. Ja kik'inyanuu nga tjihin nga kj'uaí xi ngjuai kontraha xi kits'in nibá Ntíaná,<sup>a</sup> ko xi nkú

<sup>a</sup> 2:18,22 "Xi kits'in nibá Ntíaná" tsuhu ra "Cristo".

kik'innuu b'a ts'ín nd'ai ja t'íncha f'ai nkjún já kontraḡa Jesucristo. Kui nga mankjihinná nga ja tinchajían nistjin xi fekuu. <sup>19</sup>Kui xi incha tsitjújinni ei, tunga najmi já ts'ajihín niu. At'aha tsa já ts'ajin niu, najmi incha ngji t'axín ra kai. Tunga incha tsitjuhú tu xi b'a ts'ín kiya chji chjhi nga tjín xi najmi jin makoni.

<sup>20</sup>Máha jun, Jesucristo kitsjánuu Espirituhu Ntíaná ko ngatentoo mankjinnuu ni xi naxu tjín. <sup>21</sup>Tíb'et'á xujunuu at'aha mankjinnuu ni xi naxu tjín. Najmi ngat'aha tsa najmi mankjinnuu, at'aha ní nga mankjinnuu, kui nga t'íb'et'áhanuu. Ko mankjinnuu nga ndaha nku kjuatsank'á najmi nibáha ra ni xi naxu tjín.

<sup>22</sup>Xi najmi ts'ínkjáihín nga Jesu xi kits'ín nibá Ntíaná, kui xi nku nda tsank'á. Kui xi nda kontraḡa Jesucristo, at'aha najmi ts'ínkjáihín nga Ntía Na'miná xi Ntía ko nga Jesucristo xi Ntíhi. <sup>23</sup>Tu yáha ni xi najmi ts'ínkjáihín nga Jesucristo xi Ntíhi Ntíaná, kui xi ta ndaha najmi t'jñajihín Ntía Na'miu. Tunga xi ts'ínkjáihín nga Jesucristo xi Ntíhi Ntíaná, kui xi ta t'jñajihín Ntía Na'miu.

<sup>24</sup>Kui b'a maha, t'ejñajin tehenteḡenu animanuu én xi kinu'yó santa nkúhu nga tuts'ihín ni. Tsa s'ejñajin tehente animanuu én xi kinu'yó santa nkúhu nga tuts'ihín ni, b'a ts'ín ko jun ta kuintsúbajin tehentohoo Ntíu ko Ntía Na'miu. <sup>25</sup>Nga kuintsúba t'ík'un síaán, kui nihi xi kitsúya títjunná Jesucristo nga tsjáná.

<sup>26</sup>Tíb'et'ánuu ni xu'bi at'aha tjín xi mjehe k'uanachanuu. <sup>27</sup>Tunga máha jun, t'jñajin tehentenuu Espirituhu Ntíaná xi kitsjánuu Jesucristo. Najmi machjéhen tsa tjín xi kuakúyanuu, at'aha ta kuihi Espiritu bakúyayjenuu. Ni xi naxu tjín bakúyanuu, najmi ni tsank'á. Kui nga xi nkú ts'ín tsakúyahanuu Espiritu, b'a n'e tintsúbajin tehenteḡe ruu Jesucristo.

<sup>28</sup>Kui b'a maha nd'ai, ntína, tintsúbajin tehenteḡe ruu Jesucristo, tu xi najmi jo jan kamahaná nk'ie nga kuakúchji yjoho ko najmi kama subaná nginkun nk'ie nga kj'uaí. <sup>29</sup>Yo nga naxu ts'ín Jesucristo. Kui nga ta t'jhin nga chahanu nga ngayjee xuta xi ts'ín ni xi naxu, kui xi kitsjáha Ntíaná nga ntíhi kama.

### **B'i ts'ín tsakúya Jua nga ntíhi Ntíaná kits'ín maná**

**3** Chasoo xi nkú ts'ín tjo ts'atíhi ná Ntía Na'miná, nga santaha ntíhi Ntíaná 'miná. Ko kjuaxi nga ntíhi Ntíaná ná. Kui kjuaha nga najmi behená xuta asuntee, at'aha najmi be Ntíaná. <sup>2</sup>Jun já nts'ena, ná xi ntíhi Ntíaná nd'ai. Ko ndaha tsa najmi kjee yaá nkú k'úéntaá askahan, tunga yanáá nga b'a k'úéntaá xi nkúhu Jesucristo nk'ie nga kj'uaí kúchji yjoho, at'aha cha sisián xi nkú tjín. <sup>3</sup>Ko ngatentee xi b'a ts'ín t'kuyáha Jesucristo, kui xi t'íts'ín nga t'ín'e je nginkun Ntíaná. B'a t'í'be xi nkú ts'ín je Jesucristo.

<sup>4</sup>Tu yáha ni xi t'íts'ín ngatitsun, kui xi t'í'bangane kjuatéxumaha Ntíaná. Nk'ie nga biyuné kjuatéxumaha Ntíaná, kui ni xi ngatitsuun.

<sup>5</sup>Ja yo nga j'aikúchji yjoho Jesucristo tu xi j'aikjexihin ngatitsunná. Ndaha nku ngatitsun najmi kis'ehe. <sup>6</sup>Kui b'a maha, ngayjee xi tijnajin tehentehe ra Jesucristo najmi ts'in ngatitsun. Tunga ngayjee xi tít'sin ngatitsun, najmi kjee be Jesucristo ko ta ndaha najmi kjee mankjihin yáha kui.

<sup>7</sup>Jun ntíng, najmi tu ch'a xi k'uanqanuu. Xi ts'in ni xi naxu tjin, kui xi naxu nginkun Ntíaná xi nkú ts'in naxu Jesucristo. <sup>8</sup>Tunga xi ts'in ngatitsun, kui xi ndanindoo ts'ehe, at'aha ndanindoo kits'in ngatitsun santaha nkúhu nga tuts'ihin ni. Kui kjuaha nga j'aikúchjiji yjoho Ntíhi Ntíaná, tu xi ts'inndyja xáha ndanindoo.

<sup>9</sup>Ngayjee xi Ntíaná kitsjáha nga kama ntíhi najmi nkaha ts'in ngatitsun, at'aha kjuatík'uhun Ntíaná tijnajihin. Najmi nkaha ts'in ngatitsun, at'aha Ntíaná kitsjáha nga kama ntíhi. <sup>10</sup>B'a ts'in s'ejna chjiji yá xi ntíhi Ntíaná ko yá xi ntíhi ndanindoo. Tu yáhá ni xi najmi naxu ts'in ko a ra najmi tjoho nts'e, kui xi najmi Ntíaná ts'ehe.

### **B'i ts'in tsakúya Jua nga n'etjáá xinkia**

<sup>11</sup>Nga tjin nga b'i ngjáán n'etjáá xinkia, b'a tsu én xi kinu'yó santaha nkúhu nga tuts'ihin ni. <sup>12</sup>Najmi b'aha tu n'eé xi nkúhu Cain. Kui xi ndanindoo ts'ehe. Kui nga kits'ínk'iehen nda nts'e. ¿Á kits'ínk'iehen? Kits'ínk'ien at'aha naxu ni xi kits'in nda nts'e ko máha kui, ch'on kits'in.

<sup>13</sup>Jun já nts'ena, najmi tu ma nkjúnnuu tsa ts'in unkienuu xuta asuntee. <sup>14</sup>Ja yaá ná nga tsitjuján ajihin ngabayoo ko nga kuintsuba tík'aán nginkun Ntíaná. Yaá ni xu'bi at'aha tjoná já nts'eé. Xi najmi tjin kjuatjo, kui xi tijnajin sa ngabayoo. <sup>15</sup>Ngayjee xi unkie nda nts'e, ndats'ínk'ien animahá xu'bo, ko ja yo nga nku ndats'ínk'ien animá najmi tijnajihin kjuatík'un sín.

<sup>16</sup>Yaá ni xi 'míhi kjuatjo at'aha Jesucristo kits'ínkjas'en yjoho ngandaná. B'a ta ts'in ko ná tjin nga n'ekjas'eén yjoná ngandaha já nts'eé. <sup>17</sup>Tsa nku ndanchiná tibe nga ndyjat'aha nda nts'e ni xi machjéhen tunga najmi kama nimahá ra, ¿a tijnajin kjuatjoho Ntíaná animaha? <sup>18</sup>Jun ntíng, najmi tu suba énnuu xi b'a kuitsu nga tinnuu kjuatjo nga chubo. Tu sa ní ni xi katakúchji nga tinnuu kjuatjo n'oo.

<sup>19</sup>Yaá nga ajihin ni xi naxu tintsúbajían ko najmi jo jan maná nk'ie nga tintsubaá nginkun Ntíaná. <sup>20</sup>Kui nga ndaha tsa animaná b'a titsu nga tinná jé, tunga 'yúhún chánka sa Ntíaná nga animaná ko kui xi beyjená. <sup>21</sup>Jun já nts'ena, tsa najmi chumi nihi xi tít'sinnijéná animaná, najmi jo jan maná nga tincháá nginkun Ntíaná, <sup>22</sup>ko kui tsjáná ngayjee ni xi kunchíhi, at'aha t'n'etjusaán ni xi y'éjna ko t'n'eé ni xi sasihin.

<sup>23</sup>Nga n'e s'ejián Jesucristo xi Ntíhi maha ko nga b'i ngján n'etjáá xinkia xi nkú ts'in y'éjna, kui xi kjuatéxumaha Ntíaná. <sup>24</sup>Xi

títs'íntjusun xi nkú ts'ín y'éjña, kui xi tíjñajin tehente Ntíaná ko Ntíaná tíjñajin tehentehe xuta xu'bo. Ko ngat'aha Espiritu xi kitsjáná, b'a ta n'e yahaná nga kui tíjñajin tehentená.

### B'i ts'ín tsakúya Jua má xi kui Espirituhu Ntíaná

**4** Jun já nts'ena, najmi tu n'e s'ejun ngatentee xi b'a kuitsunuu nga Espirituhu Ntíaná títs'ín nga tínchja. Tu sa ní chase sisihun xi nkú kuitsu, tu xi b'a n'e chahanu tsa kjuaxi nga Espirituhu Ntíaná tíjñajihin a ra najmi. At'aha kitsejihin asuntee já profeta tsank'á. <sup>2</sup>Xi b'a tsu nga yjoninte kik'a Jesucristo nga j'ai asuntei, kui niu xi kuakúchjinuu nga kui xi tíjñajihin Espiritu xi ts'e Ntíaná. <sup>3</sup>Ko xi najmi b'a tsu nga b'a ts'ín j'ai Jesucristo, kui xi najmi tíjñajihin Espirituhu Ntíaná. Espiritu ch'onk'un xi ts'e ní nda kontraha Cristo tíjñajihin. Ja kinu'yó nga tjihin nga kjuai xi ngjuai kontraha xi kits'ín nibá Ntíaná.<sup>b</sup> Kui ja tíjña asuntee nd'ai.

<sup>4</sup>Jun ntíntíntina, Ntíaná ts'enuu ko ja kin'e nganohoo já profeta tsank'á xu'bo, at'aha xi tíjñajinnuu 'yún tjin saha nga'yún nga xi tíjñajihin xuta asuntee. <sup>5</sup>Kui já xu'bo xi xuta asuntee. Kui nga ni xi ts'e asuntee nchjanimiyaha ko xuta asuntee basínñjuhu ni xi nchja. <sup>6</sup>Tunga máha jin, Ntíaná ts'eni. Xuta xi ja be Ntíaná, kui xi basínñjuni. Xuta xi najmi Ntíaná ts'ehe, kui xi najmi basínñjuni. B'a n'e chaha yá xi tíjñajihin Espiritu xi tsuya ni xi naxu tjin ko yá xi tíjñajihin jáninda xi b'anacha.

### B'i ts'ín tsakúya Jua mí nihi xi y'aha kjuatjoo

<sup>7</sup>Jun já nts'ena, b'i ngján n'etjáa xinkia, at'aha Ntíaná nibáha ra kjuatjoo ko ngayjee xi tjihin kjuatjo, kui xi kitsjáha Ntíaná nga ntíhi kama ko kui xi be Ntíaná. <sup>8</sup>Xi najmi tjihin kjuatjo, najmi kjee be Ntíaná, at'aha kjuatjohó Ntíaná.

<sup>9</sup>B'i ts'ín tsakúchjiná kjuatjoho Ntíaná. Kits'ín nibá Ntí nku tutuhu asuntei, tu xi ngat'aha Ntíhi sakúhuná nga kuintsuaba tík'aán. <sup>10</sup>¿Mí nihi xi 'mihí kjuatjoo? Najmi tsa ná xi kin'etjáa Ntíaná. Kui ní xi kits'íntjoná ko kits'ín nibá Ntíhi tu xi ts'ínndyjat'aha ngatitsunná nk'ie nga kitsjá yjoho xi nkúhu chje. Kuihi ni xu'bi xi tsakúchji kjuatjoo.

<sup>11</sup>Jun já nts'ena, tsa b'a ts'ín kits'íntjoná Ntíaná, kui nga ko ta ná ta tjihin nga b'i ngján n'etjohoná xinkia. <sup>12</sup>Ndaha nku najmi kjee be nkú tjin Ntíaná, tunga tsa b'i ngján n'etjáa xinkia, Ntíaná tíjñajin tehentená ko kjuatjoho s'ejña chji kikjin ajinná.

<sup>13</sup>Yaá nga tintsabajin tehenteheé Ntíaná ko nga kui tíjñajin tehentená, at'aha kitsjáná Espirituhu. <sup>14</sup>Ko jin kiya kikjin ko

<sup>b</sup> 4:3 “Xi kits'ín nibá Ntíaná” tsuhu ra “Cristo”.

tíbixínyakixi nga Ntia Na'miu kits'ín nibá Ntíhi tu xi ts'íink'ankihi xuta xi tjin asuntee. <sup>15</sup>Tu yáhá ni xi ts'íinkjáhín nga Jesu xi Ntíhi Ntíaná, kui xi tijnajin tehente Ntíaná ko Ntíaná tijnajin tehentehe xuta xu'bo.

<sup>16</sup>Mankjinná ko s'ejinná nga tjoho ná Ntíaná. Ntíaná kui xi kjuatjo, ko xi tijnajin tehente kjuatjoo, kui xi tijnajin tehente Ntíaná ko Ntíaná tijnajin tehentehe xuta xu'bo. <sup>17</sup>B'a ts'ín s'ejná chji kikjihin kjuatjoo ajinná, tu xi najmi jo jan kamahaná nistjin nk'ie nga kuasehe Ntíaná mí nihi xi kits'ín nga nkúnkú xuta. At'aha xi nkú ts'ín y'ejná Jesucristo, b'a ts'ín tintsubaá asuntee. <sup>18</sup>Má nga tjin kjuatjo najmi tjin kjuabinkjun. Kjuatjo xi kui kikjin, kui xi m'osje kjuabinkjuun, at'aha xi tjen kjuaha, kui xi tsankjún. Kui b'a maha, xi tsankjúhun, kui xi najmi kjee tijnajihin kjuatjo xi kui kikjin.

<sup>19</sup>Ná tjoná Ntíaná at'aha Ntíaná tjun kits'íntjoná. <sup>20</sup>Tsa tjin xi: “Tjona Ntíaná”, kuitsu ko tu sa unkiehé ngá nda nts'e, kui xi táb'anacha. At'aha xi najmi tjoho nda nts'e xi tíma tibase'a, znkú ts'ín ts'íintjoho Ntíaná nga najmi tíbe? <sup>21</sup>Xi tjoho Ntíaná tjin nga ta ts'íintjo nda nts'e. Kuihí kjuatéxuma xu'bi xi kin'ekjáiín.

### B'i ts'ín tsakúya Jua ni xi ts'ín xi ntíhi Ntíaná

**5** Ngayjee xi s'ejihin nga Jesu xi kits'ín nibá Ntíaná,<sup>c</sup> kui xi kitsjáha Ntíaná nga ntíhi kama. Ko ngayjee xi tjoho Ntia Na'miná, kui xi ta tjoho ngayjee xi ntíhi Ntíaná. <sup>2</sup>Nk'ie nga tjoná Ntíaná ko t'n'etjusaán ni xi y'ejná, ya chji chjiá nga ta tjoná ngayjee xi ntíhi Ntíaná. <sup>3</sup>Nga n'etjájá Ntíaná, kui xi tsuhu ra nga n'etjusaán ni xi y'ejná. Ko najmi ch'á xi áí ni xi y'ejná Ntíaná, <sup>4</sup>at'aha ngayjee xi ja ntíhi Ntíaná ts'ín nganaha asuntee. Ko ngat'aha nga s'ejinná Jesucristo, b'a ts'ín kin'e nganaha raá asuntee. <sup>5</sup>Xi s'ejihin nga Jesu xi Ntíhi Ntíaná, kui xi ts'ín nganaha asuntee.

### B'i ts'ín tsakúya Jua xi nkú ts'ín Ntíaná y'ejná chji Jesu

<sup>6</sup>Ntánijua ko jní j'ai s'ejná chjihi Jesucristo. Najmi tu suba ntánijua, ntánijua ní ko jní. Ko Espirituhu Ntíaná ta tsuya kui ni, at'aha kjuaxi ni xi nchja Espiritu. <sup>7</sup>Jan maha xi b'ejná chji yáha Jesucristo: <sup>8</sup>Espirituhu Ntíaná, ntánijuo ko jnú. Nkuhú b'a incha tsu nga joon.

<sup>9</sup>Tsa n'ekjáiín én xi nchja xuta nga nchjanimíyaha nku ni, tunga yúhún chjhi ra én xi nchja Ntíaná. Á 'yún chjhi ra, at'aha Ntíaná xi kinchja nga y'ejná chji Ntíhi. <sup>10</sup>Xi s'ejihin Ntíhi Ntíaná, kui xi animaha tijnajihin én xi kinchja Ntíaná nga y'ejná chji Ntíhi.

<sup>c</sup> 5:1 “Xi kits'ín nibá Ntíaná” tsuhu ra “Cristo”.

Tunga xi najmi s'ejihin Ntíaná, kui xi tibe tsank'á, at'aha najmi s'ejihin én xi kinchja Ntíaná nga y'éjña chji Ntíhi.

<sup>11</sup>Nga kitsjáná nga kuintsu<sub>b</sub>a tík'un síaán kō nga Ntíhi sakújinná kjuatík'un xu'bi, kui én xu'bi xi kinchja Ntíaná. <sup>12</sup>Xi tíjñajihin Ntíhi Ntíaná, kui xi tíjñaha kjuatík'uun. Tunga xi najmi tíjñajihin Ntíhi Ntíaná, kui xi najmi tíjñaha kjuatík'uun.

### B'i ts'ín kits'ínkje Jua xujun

<sup>13</sup>Kuak'iet'ánuu ni xu'bi, jun xi s'ejinnuu Ntíhi Ntíaná, tu xi chahanu nga tíjñanuu kjuatík'un xu'bi kō kuintsu<sub>b</sub>a tík'un síún.

<sup>14</sup>Ma'yúnk'aán Ntíaná, at'aha yaá tsa kuinchíhií xi nkú ts'ín mjehe nga kuinchíhií, kuasínñjuná. <sup>15</sup>Kō xi nkú ts'ín yaá nga Ntíaná basínñjuhu tu mí nihí ni xi binchihí, b'a tã ts'ín yaá nga ja n'ekjáihín ni xi kuakinchihí.

<sup>16</sup>Tsa tjin xi tibe nga ngatitsun títs'ín nda nts'e, kō tsa ngatitsun xi títs'ín najmi ngabaya tjehe<sub>n</sub> rã, nk'ie nga kuinchjako Ntíaná kanchjantjai kō Ntíaná tsjá ngáha rã nda nts'e nga k'úéjña tík'un. Ngatitsun xi najmi tjehe<sub>n</sub> rã ngabaya tínchjanijmíyahana. At'aha tjin ngatitsun xi tjehe<sub>n</sub> rã ngabaya. Najmi t'bankia nga chubantjo xi ts'ín ngatitsun xu'bo. <sup>17</sup>Ngayjee ni xi najmi nda xi ts'ín xuta, kui xi ngatitsun, tunga tjihín ngatitsun xi najmi tjehe<sub>n</sub> rã ngabaya.

<sup>18</sup>Yaá nga xi kitsjáha Ntíaná nga kama ntíhi najmi nkaha nga ts'ín ngatitsun, at'aha Ntíhi Ntíaná kuhun xuta xu'bo kō najmi ts'ínkohō ndanindoo. <sup>19</sup>Kō yaá nga Ntíaná ts'ená kō nga ndanindoo batéxumaha ngayjee asuntee. <sup>20</sup>Kō tã yaá nga j'ai Ntíhi Ntíaná kō kitsjáná kjuankjintak'un tu xi chahaná Ntía xi nku tutuu. Tintsubajihín xi nku tutuu, kui xi Jesucristo Ntíhi Ntíaná. Kuihí xi Ntía xi nku tutuu kō kui xi tsjáha nga k'úéntu tík'un sín xuta.

<sup>21</sup>Jun ntína, tiyú t'axíhuun ntía xi xuta ts'ínnda.